

یوہ آکا شوانی جموں ہے عبدالرحمن شاہین تیں خبر سنو۔

Budgam

وادی کشمیر غا بڈگام ضلع مانہ جمعہ غے روز شام نانہ دہشت گردان غی طرفوں 2 غیر مقامی اُتر پر دیش غا افراد نانہ گولی ماری گئی ہے۔ یہ دوئے افراد بڈگام مانہ جل جیون پروجیکٹ مانہ کم کر رہا تھا تے اُن غی حالت بہتر دسی جا رہی ہے۔ خبر رساں ایجنسی اے این آئی نے دسیو ہے جے یوہ واقعہ کل شام اُسویلے پیش آو جد یہ دوئے اشخاص مذہب مانہ کم کر رہا تھا۔ جد مشکوک دہشت گردان غی طرفوں اُن ور فائرنگ کی گئی۔ گولی لگن سنگ اک مزدور غا بازو ور زخم آیا ہیں تے دوجا غی لٹاں ور گولی لگیں۔ دوباں غی حالت بہتر ہے تے وے خطرہ تیں باہر ہے۔ اس حملہ غے فوراً بعد حفاظتی دستاں غی طرفوں علاقہ غی کپرا بندی کر لی گئی ہے تے حملہ آوراں نانہ پکڑن با رے تلاشی آپریشن شروع کر دتو گیو۔ حال ہی غا دنال مانہ دہشت گردان غی طرفوں یوہ تیجو حملو ہے۔ واجہ رہ جے 23 اکتوبر نانہ گگن گیر گا ندر بل مانہ دہشت گردانہ حملہ مانہ اک مقامی ڈاکٹر تے 6 مزدور ماریا گیا تھا۔ اس غے بعد پچھلے ہفتے بارہمولہ غا گلمرگ علاقہ مانہ دہشت گردان غی طرفوں فوج ور حملو کیو گیو جس دوران فوج غا 2 پورٹر تے 3 سپاہی شہید ہو گیا تھا۔ اس سلسلہ میں کل ہو ئی گولی باری غا تناظر مانہ سلامتی دستاں مذہب علاقہ مانہ بڑا پیمانہ ور تلاشی مہم شروع کی ہے۔

Youth Award

نوجوانان بارے معاملات تے کھیڈاں غا مرکزی وزیر ڈاکٹر مانسکھ مانٹویا نے نوجوانان ور زور دتو ہے جے وے باوقار قومی نوجوان ایوارڈ 23/2022 واسطے درخواست دیں۔ یہ اعزاز 15 تیں 29 بہراں غی عمر آلا نوجوانان تے اُن تنظیمان نانہ دتا جائیں۔ جنہاں نے ترقیاتی و سماجی خدمات جس طرح کہ صحت، انسانی حقوق غا باہدہ، چست شہریت تے کمیونٹی خدمات و کا کردگی دسی وے۔ یہ اعزاز اک تحفہ اک سند تے اک لکھ روپیاں غا نقد انعام افراد واسطے تے 3 لکھ روپیاں گا نقد انعام تنظیمان واسطے ور مبنی ہے۔ قومی نوجوان اعزاز 23/2022 بارے درخواست دین غی آخری تاریخ 15 نومبر ہے۔ تے یہ داخلی معاملان بارے وزارت غا سانجا اعزاز وی پورٹل ور دتی جا سکیں۔

Tribal Minister

جل شکتی جنگلات و ماحولیات تے قبائیلی معاملات غا وزیر جاوید احمد رانا نے کہو ہے جے عمر عبداللہ غی سر پرستی آلی حکومت جموں کشمیر مانہ ٹرائل طبقہ غا تعلیمی و اقتصادی مفادات ور خصوصی توجو دیتاں واں اس طبقہ غی بہتری بارے پُر عزم ہے۔ سانہ تیں گجر طبقہ غا اک وفد سنگ کل خطاب کرتاں واں وزیر موصوف نے یقین دواو جے زمین اور جنگلات ور ٹرائل طبقہ غا حقوق غی قدر کی جائے گی تے اُن غا سماجی و ثقافتی اداراں مانہ کسے خلل پایاں بغیر ہی اُن غی ترقی نانہ یقینی بنایو جائے گو۔ اسے دوران جموں خطہ مانہ ترقی پا غے نواں بنیا ماسٹراں غا اک وفد نے وی وزیر موصوف سنگ ملاقات کر غے ترقی ہون تیں بعد تعیناتیاں مانہ تاخیر بارے اپنا معاملات اُن غے سامنے رکھیا۔

Health Minsiter

صحت تے طبی تعلیم غی وزیر محترمہ سکینہ مسعود نے کہو ہے جے حکومت جموں کشمیر مانہ تمام ہسپتالاں مانہ صحت خدمات و سہولیات نانہ بہتر بنان بارے پُر عزم ہے تے صحت سیکٹر غی ترقی حکومت غی اعلیٰ ترجیحات مانہ شامل ہے۔ ایس ایم ایچ ایس ہسپتال تے سُر سپیشلیٹی ہسپتال سرینگر غا کل اپنا اپناک معائنہ غے دوران محترمہ سکینہ مسعود نے ہسپتال غا بکھ بکھ شعباں جس طرح کہ آئی سی یو و ایمرجنسی وغیرہ غو دورو کر غے اُن صحت سہولیات غو موقع ور ہی جائزو لیو۔ اُنہاں نے بالخصوص ہسپتال گا ایمرجنسی وارڈاں مانہ معیاری صحت خدمات غی اہمیت ور زور دیتاں واں کہو ہے جے حکومت جموں کشمیر مانہ عالمی سطح صحت تحفظاتی نظام نانہ قائم کرن بارے کوشاں ہے۔

ISRO

بھارتی خلائی تحقیقی ادارہ اِسرو غی طرفوں جمع غے روز بھارت غا پہلا انیلاگ خلائی مشن نانہ شروع کرن بارے اعلان کیو گیو ہے۔ جہیڑو کہ لہیہ لداخ مانہ چلے گو۔

GST Collection

اشیاء و خدمات ٹیکس یعنی جی ایس ٹی غی اکتوبر مہینہ مانہ 1 عشاریہ 87 لکھ کروڑ روپیاں غی وصولی ہوئی ہے، جہیڑو کہ 9 فیصد غو باہدو درج کیو گیو ہے۔ تے گھریلو فروخت مانہ باہدو اور بہترین تکمیل و تعمیل سنگ باہ آج تک غی دوجی بڑی ماہوار وصولی ہے۔ اس گذریہ مہینہ غے دوران سینٹرل جی ایس ٹی غی وصولی 33 ہزار 8 سو 21 کروڑ روپیہ ہوئی ہے۔ ریا سٹی جی ایس ٹی غی وصولی 41 ہزار 8 سو 64 کروڑ روپیہ ہوئی ہے۔ تے مربوط جی ایس ٹی یعنی آئی جی ایس ٹی غی وصولی 99 ہزار 1 سو 11 کروڑ روپیہ ہوئی ہے۔ جد کہ بیس غی وصولی 12 ہزار 5 سو 50 کروڑ روپیہ ہوئی ہے۔ 1 کروڑ 87 لکھ 3 سو 46 کروڑ روپیاں غی وصولی سنگ مجموعی جی ایس ٹی غی وصولی مانہ 8 عشاریہ 9 فیصد غو باہدو درج کیو ہے۔ اکتوبر 2023 مانہ جی ایس ٹی غی وصولی 1 عشاریہ 72 لکھ کروڑ روپیہ تھی۔ اکتوبر مانہ جی ایس ٹی غی وصولی غی دوجی سب تیں بہترین کارکردگی رہی ہے۔ جی ایس ٹی غو یوہ بدہتو اعدادوشمار گھریلو کھپت و درآمدی کا روائیاں آلی بھارتیہ اقتصادیات غی بہتر رفتار نانہ ظاہر کرے۔ ماہرین غو کہنو ہے جے تہواری موسم آلی فروخت تے بدہتی تعمیل غا شاندار جوڑ سنگ جی ایس ٹی غی یاہ خوشحال وصولی ہوئی ہے۔
